

普洱府志稿卷之四十九

雜志一

九流有雜家之名西陽有雜俎之著雖無關政治而博雅君子樂於考證則雜志安可少哉郡志自天文地理人物等目而外而雜志亦不可闕其有附之無可附者因列雜志一門自古蹟以及異聞亦並收之以見細微之不遺也志雜志

古蹟

古人遺蹟播之咏歌于三百篇為最古召公棠茇碩人槃澗傳之千載猶使人往復流連讀其書而思其

普洱府志稿

卷之四十九

雜志一

古蹟一

地豈非以其人歟下至西京雜記寰宇記等書記載尤多誠以古蹟雖無大關係然亦考古者所不廢也普洱開拓最晚古蹟無多其有可以傳者亦博採而無遺儻亦風人之意乎

普洱府

甯洱縣

舊車里軍民宣慰司

一統志在城南七百四十五里

古產里地呂覽伊尹四方獻令曰產里以象齒短狗獻後周公作指南車導之歸故名車里 明史藁車里為倭泥貂獾蒲刺黑角諸蠻雜居不通中國元大

德中置撒里軍民總管府明改車里軍民宣慰司雍正七年改土歸流分車里司所轄江內六版納思茅普勝整董猛烏六大茶山橄欖壩置普洱府其餘江外六版納仍隸車里而改屬於普洱府

小徼里

〔一統志〕在車里宣慰司東卽小徼里也

明

〔一統志〕車里別部曰小車里嘉靖開車里附於緬外有二宣慰司在大車里者應緬在小車里者應漢

耿凍路

〔一統志〕在車里宣慰司境

〔明統志〕元時徼

里軍民總管府領六甸後又置耿凍路領耿當孟弄二州

普洱府志稿

卷之四十九

雜志一

古蹟

二

孟遠箐

〔一統志〕在車里宣慰司東南又有孟累箐在

司西慢法箐在司西北皆車里別部

祭鑼洞

〔舊雲南通志〕在莽芝山半石洞中有銅鑼一

匡郭剝蝕夷人每於春耕時取鑼祭之祭畢仍置故處秋時再祭則年穀豐稔或不誠歲卽歉相傳武侯所遺迄今奉爲神物

孔明塔

〔舊雲南通志〕有二一在九龍山之西南接莽

屬孟良界高十丈許相傳爲孔明所建有塔倒歸流之讖雍正六年其塔倚向東北識者謂東北爲

神京所在歸流嘗驗七年逆夷平果改設流官一在九

龍江之南六里許高十丈餘相傳亦武侯所建旁有樹一株名萬年青玲瓏環抱最爲奇異塔後卽武侯立營處

祭風臺 舊雲南通志在城南六茶山之中登其上可

俯視諸山相傳武侯於此祭風又呼爲孔明山

六茶山遺器 舊雲南通志俱在城南境舊傳武侯遍

歷六山留銅鑼於攸樂置鏐於莽芝埋鐵磚於蠻磚遺木桺於倚邦埋馬鐙於革登置撒袋於慢撒因以名其山又莽芝有茶王樹較五山茶樹獨大相傳爲武侯遺種今夷民猶祀之

普洱府志稿 卷之四十九 雜志一 古蹟三

元碑 舊志在整控江西岸大元二年遣將都不花統

軍招降勒碑石壁字多漫滅惟國號年月可辨以上在思茅猛地

石巖石堆 舊志巖在坤甸堆在黃草壩相距五里許

彼應此鳴此鳴彼應土人云石如有聲之年多主災厄

整董井 舊志距府城二百餘里有整董井相傳蒙詔

時有土目叭細里佩劍歷川源忽見一井水甚潔細里偶以所佩劍插水中度水淺深後拔劍歸逾數日視其劍似白鏹所鑄者細里疑之斷以斧斤鐵盡變

為銀後復迹之不得其處歷唐宋元明諸傳其事此井屢見屢驗屢迹屢不見

千歲潭 舊志在習冷河水極幽深昔永明王入緬至

此為流冠所窺遂棄輜重於潭內因名曰千歲潭

志及劉健庭聞錄永歷入緬由池西未來池南此說恐訛傳或是偽晉王至此而誤也 以上在甯洱猛地

龍虎地 舊雲南通志在城北三里池邇南來氣象萬

千其過峽處斬如巉巖相傳武侯南征時鑿其脈以制蠻夷

蝦洞 甯洱縣採訪在城西南隅四里多產蝦人有從

普洱府志稿 卷之四十九 雜志一 古蹟四

蟠龍洞入撈粗糠從此洞水流出乃知水源自彼而來但蟠龍洞多魚水流蝦洞而魚不往此疆彼界截然分明殆天成也

插劍石 甯洱縣採訪在城東七十里義正里石岸上有劍插入石中可搖不可拔亦不詳其所自

仙韭 甯洱縣採訪在城西五十里當歸山之峰極高產仙韭樵採者遇之攜歸供饌有味絕佳者有化為青草不可食者

仙人洞 舊志在天碧山絕頂洞口高約七八丈雖不甚深中極幽靜常有雲氣出入

溫泉

舊志在城西南隅十二里泉從山腹出大而清

澈溫煖得宜黑塊者入浴皮膚變雪白色垢膩自褪不待以手搓擦也疥癩者浸其中二三刻不藥而愈

滾泉

舊志在城西北二十里隆冬之閒泉水滾熱近

者流汗燻雞犬毛無不脫落者人不敢入其中浴

白雞石

舊志在龍洞中形如雄雞棲有常所春夏閒

兩洞之水溢出相交俟水落即可種植鄉人以占農候當水溢之時每至此處而止石可聽人取動常有牧童抱置他所越宿仍回故處自此石失後而洞水溢出無所限制

普甯府志稿

卷之四十九

雜志一

古蹟五

求子石

舊志在天筆山下普祥寺左偏禱嗣多驗自

道光十五年郡人修葺祠宇後則顏之曰普陀巖

觀音山湧泉

舊志山在治北極高素無水源道光十

三年重修山寺有人負龍王神位一置寺門外越數日首事者見寺左坡坎上土氣甚潤命匠掘之得泉一區水脈極旺遂引入殿下匯爲曲池自此汲取灌溉頗稱便焉

蟠龍洞

舊志在城西山後洞分雌雄冬春水消夏日

水由洞出兩相交合村人每伺而取魚所得不可數計水消之際可以秉炬而遊郡人好事者入洞二日

而還云自觀音堂入騙馬石捨身巖天星洞至龍宮殿殿前石筍結爲燈綵蒲團鐘鼓之勢水聲動盪成金石絲竹之音殿後有三洞深不可測昔有緬僧自洞口石壁對經至此而止郡人遂無敢入者

思茅廳

諸葛營

舊雲南通志在城外之西南里許諸葛武侯

擒孟獲直抵莽緬往來經過駐軍於此址尙存

思

茅廳採訪上有武侯祠深溝高壘遺址猶存相傳每值邊警夜半輒有礮聲如雷震山鳴土人謂之陰礮

班鳩坡

舊志普洱入思茅古道甚險康熙二十年車

普洱府志稿

卷之四十九

雜志一

古蹟六

里有神象出普夷人迹之自普而返象從一高嶺奔行人步追之遂成通道卽今之班鳩坡也今普藤河畔有象足跡大如斗

攸樂廢城

舊雲南通志舊屬元江府無城雍正七年

設府同知分駐巡撫張允隨題請築土城今缺裁城

址尙存

威遠廳

天成洞

舊志距城北二十里宣化鄉地舊無水源雍

正七年忽大雷雨山頂洞開洪濤奮怒有巨石如屋者滾滾西下水流之越七八里與海子通由是開墾

成田

鳳凰巖 〔舊志〕距城二百里猛班地界兩巖相對恰如雙鳳故一名鳳巖一名凰巖有鳥道可通好事者登其頂見鳳巖上有古洞洞有石几上列書一卷劍一柄朗然在目

虎石 〔舊志〕在城北三十里景谷抱井河二流處有石如踞虎高數尺水泛不能沒相傳景谷河頭舊有二石曰雌曰雄一夜水泛而雄流於此卽茲石也雌仍在故處兩石相望聞作相應聲則河中必有風波涉者不敢過

普洱府志稿

卷之四十九

雜志一

古蹟七

古鐘 〔舊志〕在元龍古寺相傳鑄鐘將舉火數次不成忽有老嫗擲錢數枚於鑪乃成濶二十四尺高九尺許環鈕蛟形古色斑爛其聲甚洪聞二十里外頂上有錢印字蹟分明

古鑪 〔舊志〕在佑聖宮鑄於國初年間鑪口罄腹兩翅三足班痕絢爛底有隙時滴瓊漿人取以療目疾多效

金雞石 〔舊志〕在抱母井北隅有山形如彌勒佛相傳上有金雞化而爲石每金雞一鳴而四境羣雞附和

他郎廳

恭順故州 舊志一統志在元江府城西南一百四十里明初改他郎寨土司爲恭順州順治十八年省入元江府雍正十一年設府通判一員仍住他郎寨卽今他郎廳治也其恭順故州在今他郎廳城北二十里今稱碧朔村其城垣基址四門村人歲歲修補至今無恙

龍泉 舊志在城南五里筆架山下有龍潭泉湧如珠石烟 舊志在城西五里卜左村石均中通一竅極深有烟裊裊四時不絕居民以烟所指卜吉凶

香樹梁 他郎廳採訪在至聖廟道光元年邑紳金棠 普洱府志稿卷之四十九 雜志一 古蹟八

勑建聖廟求棟梁山得球香樹玲瓏如繡球狀而香干霄蔽日莫可仰視蓋千百年物也伐而度之長九丈圍八尺竟體皆馬尾紋丁香節斑斕異彩於是廟堂以成然其地東距城僅七里許數百年來官舍巫祠纍纍相望顧何以棄置不用得長留至今乎洵可異耳

僞明晉王李定國墓址

舊志在猛臘按定國乃綏德州義讓里棘鍼人索勇幹且剛直順治初流寇張獻忠被勦後餘黨推立獻忠養子孫可望爲長同受約束而定國獨與之不睦尋

於順治四年入滇十三年降附永歷朱由榔以粵西
安隆所迎扈功封晉王後以永歷兵敗入緬因攻緬
甸欲再迎永歷遂由九龍江走景綫屯猛臘欲由交
岡走交趾入廣東未幾聞永歷訃至於是哀憤成疾
而死時康熙元年六月二十七日也死後原葬猛臘
因定國子嗣興自思茅舉眾來降後乃改葬順天蘆
溝橋西胡家港其猛臘葬所遺址尚存至今寸草不
生夷人過之必拜而後去焉